

Geb endlich Ruh!

Die Stillung des Sturms

(Markus 4, 35, 41)

Predigt in Kurpfälzer Mundart

von Pfarrer i.R. Oskar Ackermann, Brühl / Baden

Evangelische Kirche Brühl am 6. November 2016

Liewe G'mei, ihr liewe Christeleit'!

Jetzerd brauch ich bal(d) mei' Ruh', denkt sich de Jesus un dud gähne. Es war jo en lange Tag, den'er am scheene See Genezareth verbracht hod. Schun frieh am Morje is'es losgonge. En Haufe Leit' sin(d) zu'em g'strömt, die ihn hawe sehe un höre welle. Ihn, vun dem'se sage: des is de Messias, de erwartete Heilsbringer, mit dem alles besser werre soll. Des Reich Gotte, so sagt'er selwer, hod mit ihm o'g'fange. Wunner hod der Mann vun Nazareth vollbracht: Blinne sehe, Lahme gehe. So eener, den muss mer g'sehe hawwe. Un predische soll'er kenne, dass oim s'Herz uffgeht.

Em Jesus g'fällt's, dass so viel Leit' kumme un ihn heere welle. Er hod jo was zu sage: die frohe Botschaft, s'Evangelium. Desdewege nimmt'er den Stress uff sich. Un weil's heit arg viel Leit' sin, die sich um ihn drängle, steigt er in e Boot, des am Seeufer liege dud. Vun do aus beginnt'er zu predische. Er dud heit viel Gleichniss' verzähle, - des vom Senfkorn un vom Säemann z.B.

Noch de Mittagspaus' gehe viel Leit' wieda fort. So hawwe g'nug g'sehe un g'hört, ihr Neigier is befriedischd. Awwer di wu bleiwe, kumme ins G'spräch mit em Jesus, diskutiere un erfahre so noch mehr, was die Gleichniss' bedeute solle. Jesus merkt, dass'er noch viel Überzeugungsarbeit leiste muss, bis bei allene de Grosche fällt. Awwer bei seine eigene Jünger denkt'er sich: Do is de Glaawe ans Reich Gottes scho groß, die hab' ich berufe, do wächst was Gutes.

Es is Owe'd g'worre noch dem lange Tag. Aa en Jesus werd müd'. *S'reicht, ich brauch jetzerd mei Ruh',* säch(g)d'er zu seine` Jünger, *alla, Buwe, losst uns uff die annere Seit' vom See rüwwerfahre. – Gute Idee, Meeschder, des mache mer. Mir hawwe do e paar Fischerboot' liege. In des eene steige mir Jünger oi(n) z'samme mit dir, in dene annere kenne noch e paar vun Doine treue O'hänger mitfahre.*

So wird's donn g'macht: Leine los, Segel setze un ab geht d'Fahrt. Noch en korze Blick zum Himmel wegem Wetter. Ha, es werd scho hewe bis mer drüwwe sin uff de anner Seit' vum See.

Jesus sucht sich im Heck von dem Boot e Plätzle, wu'er sich no'lege kann. Er schiebt sich noch eens von dene abgewetzte Ruderkisse' unner sein Kopp. Er vertraut seine Jünger un läßt'se worschdle. Die hawwe's als Fischer jo druff des Segle. Donn dud'er oi'schlofe.

Sie g'winne an Fahrt, e frisch' Windle kummt uff. Doch: Was heißt do e frisch' Windle? Vunwege, moin Liewer! Uff ä Mol werd aus dem Windle en mordsmäßige Sturm. Ä Böe jagt die anner'. En Starkrege' setzt oi'. Mit letzschder Kraft kenne d'Jünger d'Segel runner losse un d'Ruder oi'hole. Alles noch irgendwie Routine, scho mehrfach erlebt un dorchg'stanne. Un jetzerd schwappt aa noch Wasser ins Boot, Welle uff Welle. Wie wild schreie sie dorchennanner un schöpfe wie verrückt Wasser. Patschnass sin'se. E paar kotze wie d'Reiher. Un do kriege aa die Berufsfischer s'Muffesause. Noch is keener üwwer Bord gange. Oder doch? Plötzlich merke se: Wu is denn de Jesus, unser Meeschder? Ja, wu is'er denn? A, gibt's denn so ebbes? Hinne im Boot, do dud'er fesched schlofe – wie e Kind, des g'schaukelt werd. A her, der is unsa Boss! Der muss doch spüre, dass do bei uns de Deifel los is! Warum macht'er denn nix?! Drum due'se ihn gonz hordisch wachrüttle. *Meeschder, is Dir's schnorzegaal, dass mir do verrecke!?*, schreie'se in ihrer Ängschd un Not.

Doch de Jesus sagt nix zu seine' Leit', er will glei' handle. Er richtet sich uff, stemmt sich gege den g'waltische Sturm, legt sein ganze Zorn in sei' Stimm' un brüllt in de' Wind nei: *Geb endlich Ruh' – un hör uff zu Tobe' un zu Heile*. Glei' druff kenne d'Jünger nur noch staune, aa selle Leit' in de annere Boot': *Konn so ebbes sei?* De Sturm hod urplötzlich nochg'losse!

Jetzerd die große Ruh', - e Still', die wiederum u'ruhisch macht. Do war doch was? Ebbes, was'se in Todesnöt' versetzt hod: alles war wie wegg'bloose, was'se an berufliche Ke(ö)nne un Glaubensstärk' ausgezeichnet hod. Alles weg! Nur noch große Still' un leere Ratlosigkeit is do. Ewe hawwe se noch im Sturm vor Ängschd gebrüllt, jetzerd bringe vor lauter Ängschd koin Ton mehr raus. Was is mit'ne passiert?! Was is bei'ene verlore gange? Warum so e innere U'ruh'?

In dere Situation stellt de Jesus zwee Froge an se: *Hei Männer, warum dud ihr eich so förchde? – Oh ihr liewe Feund', habt ihr koin Glaawe mehr?*

Zwee Frooge, die was löse solle. D'Jünger solle wieda handle, denke un fühle kenne. Sie solle jetzerd wieda ihr Sach mache, wieda ihr'n Kopp oi'schalte, nochdenke mit Sinn un Verstand. Un des alles abrunde un absichere mit dem G'fühl vun Glaawe un Vertraue, Liewe un Hoffnung. So werd aa bei ihne wieda e gut' Ruh' oi'kehre.

Uff die Froge vum Jesus müsse'se selwer die richtische Antworte finne. Un des braucht sei' Zeit. Noch stehe'se unner Schock un stammle wie die annere Leit': *Was is denn des fer oiner, unser Herr un Meeschder! Sogar Wind un Meer du'em g'horche*.

Jo, en Schock war's, awwer en heilsame'. Sie schlucke ihr'n Schreck runner un denke fer sich: Jo, mir nemme uns d'Ruh; in aller Ruh wolle mir dem Jesus vertraue un an ihn glaawe. Sie welle's probiere un mache ihr Sach'. Sie rischde in

aller Ruh` un mit all dem G'schick un Ke(ö)nnē, des'se hawwe, ihr Boot wieder so weit her, damit se sicher weiterfahre kenne.

Un sie denke in aller Ruh` noch un erinnere sich: Wie hod unsa Glaawe o`g'fange? Fischer ware mer un hawwe am Seeufer unsa Fangnetz` g'flickt. Un do es de Jesus g'kumme, hod mit uns g'schwätzt un donn zu jedem, von uns g'sagt: *Folge mir nach!* Aa den Levi-Matthäus hod er vun seiner Zollstation so wegg'rufe: *Folge mir nach!* Hajo, er, de Jesus, der hod uns g'rufe, der hod uns vertraut. Es war sei` Wort, sei` Macht, sei` Charisma. Des wirkt in uns, des wächst in uns – wie e winzisches Senfkorn, des zum große Strauch im Garde werd; - so hod's de Jesus in sei`m Gleichnis verzählt. Un dass mer imma wieda Zweifel kriege oder in Krise` fast verzweifle un hadere, in höchste U`ruh` verfalle? Hej, was hod unser Meeschder grad vorhin in den große Sturm mit kräftischer Stimm` nei`g'rufe? *Geb endlich Ruh!* Wemmer des rischdisch verstehe, kann er dodemit ned nur den Sturm un d'hoche Welle g'moint hawwe, sondern aa uns mit unsra üwwertriebene Ängschd un unserm schnelle Lamentiere`. Jesus moint aa uns: *Geb endlich Ruh!*

U`ruhische Zeite, ihr liewe Leit`, des hawwe mir scho` alle erlebt, mehr als g'nug – im Große wie im Kleene, durch Kriege, Terror, Katastrophe un Naturgewalte, - in unserm Alltag, Stress im Beruf, Zoff in de Familie, in de Eh`. Oder mit dem, was do im Weltg'schehe un in de Politik alleweil passiert.

Awwer kann mer do eefach devu` laafe? Un es bringt aa nix, sich in e Eck` zu verkriesche, still zu jommere un abwarte, bis alles besser werd. So e faule Ruh` zählt ned! Oder dass mer laut Parole brülle` dud, schimpfe` un demonstriere`: Ihr do owwe macht alles falsch! Oder im Netz en shit-storm ablosse` mit verlogener Stänkerei, - Hassmails, die d'Mensche`würd` verletze`! Nee, nee, so geht's aa ned.

Geb endlich Ruh! Wenn de Jesus so ebbes sage` dud, will er koi Friedhofsruh` hawwe. Wie domols bei seine` Jünger will er heitzutag bei uns des bewirke`: wenn's brenzlich werd, wieda zur Ruh` finne; - zu eener Ruh`, in der mit Herz un Verstand Krise`, Verwicklunge` un Probleme annerschd g'sehe, entschärft un` vielleicht aa g'löst werre kenne. Awwer er will ned nur e Ruh` vun ebbes, sonder aa e Ruh` zu ebbes.

Wie kann ich soddische Ruh` finne un mich druff oi'losse? Ich meen, des kann ganz unnerschiedlich un vielfältig sei.

Die eene schnaufe` erst e Mol dief durch – un noch e Mol gonz dief. Annere welle abschalte` – bloß abschalte`, nix mehr sehe`, Löcher in d'Luft gucke`. Oder was mache`, oinfach was treuwe` – aa ohne Sinn un Verstand, was ganz anneres due un sich dodemit ablenke`. Doch donn wieda nochdenke` un sich b'sinne`. B'sinne` uff des, was mer hod oda so gern hawwe mecht`.

Vertraue` z.B., vertrauliche Gespräch` mit wem aa immer. Vertraue` zu Mensche` g'winne`, Verlässlichkeit erfahre`.

Liewe: Durch wen werd` ich geliebt, - wen du ich liebe? In was, durch was bin ich geborge? Hab ich e Gemeinschaft oder Freundschafte`, die mich trage` un mir Halt gewwe?

Un de Glaawe – gibt der mir noch was? Seie mer ehrlich: Do is doch was dief in mer drin; e Worzel, durch die ich so was wie Kraft ziehe` kann: e Wort aus Biwwel, des mer wieda oi`fällt – moin Kunfirmationsspruch z.B., en Psalm, d`Losung des Tages, die ich les`, e Lied aus`em G`sangbuch, des mer oi`fällt, Sätz`, die mir uff ä Mol viel bedeute` un gewwe.

Bete` – ha, ich probier`s mol wieder. Ich kann`s doch noch, des Gebet, des Rede` mit Gott: bitte`, klage`, froge`, danke` un lobe`. Un ich derf aa druff vertraue, dass annere fer mich bete`, z.B. sonntags in de Kärch` beim Fürbittengebet,

Un ned zuletschd derf ich mich an selles erinnere: nämlich dass de gute heilische Geist Gottes, mit dem ich seit meiner Tauf` jo irgendwie verbandelt bin, dass der mir helfe` kann un will. Dass ich den o`rufe derf, wenn ich ganz schwach bin, damit der wieda Ruh` in mein Lewe bringt.

All des sin` mei` G`fühle, mei` Wünsch` un Hoffnungen, die ich hawwe kann un die mer helfe`.

De Glaawe, ihr liew Leit`, is e G`schenk Gottes an uns, an jedes vun uns. Mache mer was draus. Als Christe` brauche mer koi verzagt`s Häufle z`sei. Mir kenne uns was zumute. Hinner uns steht nämlich unser Herr Jesus Christus, der uns berufe` hod un uns vertraut. Des derf uns wirklich freue` un uns e gute Ruh` gewwe. *Jesu, meine Freude!* – so kenne mer singe.

Bei all dem muss ich moin Kopp ned abschalte. Den brauch ich jo imma wieda – un des ned zu knapp! Ich muss z.B. bei dem, was mer alles zu höre` kriegt, üwwerlege` un prüfe`, was is do wirklich g`loffte; – um welle Fakte geht`s un stimme` die aa wirklich. Ich muss mich doch ned bleeder mache` als ich schon bin. Ich hab` doch s`Denke` g`lernt. Moi Wisse` setz` ich oi(n), wu ich lewe` un schaffe` du – un wu ich`s fer nõtisch halt. Ich hab mei` Fähischeite`, mit dene ich in weitere Bereische was zum Gute` fer alle bewirke` kann, – mit dene ich mich in die öffentliche Diskussione` einmische` kann un bei Aktione` wie z.B. for de Klimaschutz mitmach`.

Drum, ihr liewe Christeleit`, derfe un müsse` mir aa heit` – wie domols de Jesus – laut rufe`: *Geb endlich Ruh!* Un zwar dort, wu Mensche unter Terror, Krieg, Naturkatastrophe`, Hunger un Krankheite` leide`; wu Mensche laut g`hässige Parole` schreie` un Lüge` verbreite: *Geb endlich Ruh!*

Un uns selwer derfe un müsse mer zurufe: Find zur Ruh! Immer wieda kenne mir uns so gege`seitisch ermutische`: *Geb endlich Ruh!*

In aller Ruh` un G`lassenheit lewe un glaawe – mit Herz un Verstand, fröhlich un umsichtisch. Denn unsa Herr Jesus Christus hod en große Schirm üwer uns g`spannt, der uns schütze` un ermutische` will. Ame(n)

Un de` Friede Gottes, der wu hecher is als alles, des mer denke kenne, der soll eire Herze un Sinne in de` Reih` halte durch Jesus Christus, unsern Herr. Ame(n).

Evangelische
Kirchengemeinde
Brühl

